

Olimpijski komitet BiH

STRATEGIJA

JANUAR, 2025. GODINE



**2025
2030**

+387-33-580-350
ALipašina bb,
OC Zetra
71000 Sarajevo



PREDGOVOR PREDSJEDNIKA

Akad. prof. dr. Izet Rađo

Olimpijski komitet Bosne i Hercegovine je krovna sportska institucija u Bosni i Hercegovini. U svom članstvu okuplja 41 sportski savez Bosne i Hercegovine, od čega 30 olimpijskih i 11 neolimpijskih sportskih saveza.

Strategija Olimpijskog komiteta Bosne i Hercegovine sumira osnovne smjernice rada i djelovanja OK BiH u narednom periodu i predstavlja značajan korak ka ostvarenju naših zajedničkih ciljeva u oblasti vrhunskog sporta, olimpiзма i olimpijskih vrijednosti.

Ova Strategija je rezultat predanog rada i posvećenosti svih nas koji vjerujemo u potencijal vrhunskog sporta u Bosni i Hercegovini.

U kontekstu izazova sa kojima se susrećemo, aktivan rad na rješavanju sistemskog finansiranja vrhunskog sporta u Bosni i Hercegovini postaje ključno pitanje.

Prepoznamo da obezbjeđivanje adekvatnih sredstava i resursa predstavlja osnovu za razvoj sportista, infrastrukture i stručnog kadra koji će voditi naše sportiste ka uspjehu na domaćim i međunarodnim takmičenjima.

Osim toga, ova Strategija naglašava sveukupno unapređenje i razvoj sporta i sportskih rezultata kao važan prioritet. Cilj je unaprijediti uslove koji će omogućiti mladima pristup sportskim aktivnostima, promovisući zdravlje, timski duh i fair play. Saradnja sa svim relevantnim institucijama nadležnim za sport u Bosni i Hercegovini biće temelj našeg daljnjeg rada.

Uvjereni smo da zajednički naponi, dijalog i partnerstva sa vladinim institucijama, nevladinim organizacijama, sportskim savezima i školama mogu kreirati održiv okvir koji će podržati naše ambicije i vizije.

Zahvaljujemo se svima koji su doprinijeli izradi ove Strategije. Njena implementacija zahtijeva kolektivnu posvećenost i zajednički rad svih nas, kako bismo osigurali svijetlu budućnost sporta u Bosni i Hercegovini.

Olimpijski komitet Bosne i Hercegovine pokreće put ka novim uspjesima, i pozivamo vas da nam se pridružite u ovoj misiji.

S poštovanjem,



Akademik prof. dr Izet Rađo
Predsjednik OK BiH



I VIZIJA

Razvoj sportskog sistema Bosne i Hercegovine i maksimalna podrška vrhunskom sportu BiH.

II MISIJA

Razvijati, promovisati i štititi ideje olimpizma, olimpijske vrijednosti i sport uopšte. Unaprijediti Olimpijski pokret u Bosni i Hercegovini i predstavljati BiH na olimpijskim igrama i svjetskim, kontinentalnim i regionalnim takmičenjima koja se održavaju pod patronatom IOC-a, EOC-a, ICMG-a i ANOC-a.

III VRIJEDNOSTI

Osnovne vrijednosti kojima se rukovodi OK BiH u radu su:

- Izvrsnost
- Etičnost i fair play
- Transparentnost i odgovornost
- Poštovanje
- Sinergija
- Integritet i kontinuitet u radu

Kao krovna sportska organizacija u BiH, OK BiH teži ka izvrsnosti postavljajući sebe kao primjer u vođenju drugih organizacija (leading by example).



IV KLJUČNI STRATEŠKI PRIORITETI

1.SPORTSKI SAVEZI BIH

Sportski savezi BiH su u samom središtu vizije, misije i strateškog djelovanja Olimpijskog komiteta Bosne i Hercegovine. OK BiH će nastojati da poveća podršku i smjernice koje pruža za 41 sportski savez BiH, a posebno 30 olimpijskih sportskih saveza te unaprijedi međusobnu saradnju. Nastaviti rad na razvoju i konstituisanju sportova koji nemaju državni sportski savez, pogotovo onih koji su na programu Olimpijskih igara.

2.FINANSIRANJE VRHUNSKOG SPORTA U BIH

Finansiranje vrhunskog sporta u Bosni i Hercegovini predstavlja kompleksan problem koji je rezultat kombinacije više faktora. OK BiH je aktivnosti na rješavanju problema sistemskog finansiranja vrhunskog sporta započeo još krajem 2022. godine. Minimalni pomaci u finansiranju bh. sporta su nedostatni za strateški razvoj sportskog sistema i konkurentnost bh. sportista na međunarodnoj sportskoj sceni. Proaktivno djelovanje na rješavanju ove problematike uključuje održavanje sastanaka sa institucijama nadležnim za sport u Bosni i Hercegovini na svim nivoima vlasti, insistiranje na 9 zaključaka Okruglog stola, javnu kampanju u saradnji sa olimpijcima, vrhunskim sportistima i sportskim savezima, te sve ostale aktivnosti koje će doprinijeti konačnom rješavanju problema finansiranja sporta u Bosni i Hercegovini. Takođe, bazirano na činjenici da Administracija i rad kancelarije OK BiH od strane državnih institucija nije finansiran niti jednom konvertibilnom markom tri decenije, jedan od strateških ciljeva će biti da se ta praksa promijeni, te da se na taj način uveća kapacitet, efikasnost i efektivnost Administracije i organa i tijela OK BiH.

3.OLIMPIJCI I VRHUNSKI SPORTISTI

Sportisti su "srce Olimpijskog pokreta", bilo na vrhunskom nivou ili na bazičnom nivou. Kroz Strategiju 2025 - 2030 OK BiH će unaprijediti posvećenost pružanju sigurnog, jednakog i inkluzivnog okruženja za olimpijce i vrhunske sportiste kako bi dostigli svoj puni potencijal, sa posebnim osvrtom ka Olimpijskim igrama. Krajnji cilj programske podrške je uvećanje broja direktno kvalifikovanih sportista na međunarodnim višesportskim takmičenjima te ostvarivanje boljih rezultata i u konačnici osvajanja prve olimpijske medalje za Bosnu i Hercegovinu.

4.MLADE OLIMPIJSKE NADE

Odlazak talentovanih i vrhunskih sportista iz BiH predstavlja veliki problem. Bazirano na iskustvu dva realizovana projekta podrške mladim olimpijskim nadama, OK BiH će shodno dostupnim projektnim mogućnostima nastaviti podršku mladim olimpijskim nadama Bosne i Hercegovine. Ulaganjem u mlade sportiste, stvara se osnov za buduće uspjehe na međunarodnim takmičenjima. Podrška mladim olimpijskim nadama nije samo ulaganje u sport, već i ulaganje u budućnost društva, zdravlje i prosperitet zajednice. Ona stvara temelj za razvoj budućih sportskih uzora i osigurava da se vrednuju trud i predanost na putu ka vrhunskim uspjesima.

5.MEĐUNARODNA VIŠESPORTSKA TAKMIČENJA

Učešće na višesportskim međunarodnim takmičenjima u organizaciji MOK-a, EOK-a, ANOK-a, ICMG-a. Ostvarivanjem strateškog cilja uvećanja finansiranja vrhunskog sporta u BiH direktno bi uticalo na brojnost bh. timova na međunarodnim višesportskim takmičenjima kao i konkurentnosti bh. sportista za najviše plasmane.

6.KANDIDATURA ZA DOMAĆINSTVO YOG-A

OK BiH će nastaviti da zagovara ideju o kandidaturi Sarajeva i Istočnog Sarajeva za domaćinstvo zimskog izdanja Olimpijskih igara za mlade (YOG). Pored međunarodne podršku koju je OK BiH dobio od olimpijske zajednice Evrope i Međunarodnog olimpijskog komiteta, aktivno će se djelovati na dobijanju podrške relevantnih institucija države Bosne i Hercegovine. Benefit domaćinstva zimskog YOG-a su višestruki za bh. društvo, a posebno za obnovu infrastrukture koja bi ostala kao najvrijednije naslijeđe pomenutog globalnog sportskog događaja. U posljednje vrijeme javlja se i ideja da se BiH zajedno sa nekom od zemalja u susjedstvu sa jakom tradicijom i infrastrukturom u zimskim sportovima, kandiduje za zimske olimpijske igre te i ovu opciju treba razmotriti.

7.UPRAVLJANJE I MENADŽMENT

Strateški cilj je osnaživanje Stručne službe OK BiH i upravljačkih struktura putem edukacije i usavršavanja ljudskih resursa OK BiH. Kapacitiranje stručnog kadra koje će svojim sposobnostima omogućiti proširenje kapaciteta aktivnosti i djelovanja koja su u ovom momentu maksimalno iskorištena. Savremeni sport iziskuje kompetencije širokog spektra sposobnosti i vještina administracije.

8.MARKETING AKTIVNOSTI

Strateško djelovanje u oblasti marketinga i sponzorstva su ključni za unapređenje programskih aktivnosti OK BiH te doprinosa i podrške olimpijcima i vrhunskim sportistima. Cilj je zadržati postojeće partnere te proširiti partnersko-sponzorsku saradnju sa kompanijama i privrednicima pružajući dodanu vrijednost kroz saradnju. Takođe, cilj je educirati sportske saveze u ovom polju i pomoći im da kreiraju marketing planove, proizvode i aktivnosti.

9.PROJEKTNE AKTIVNOSTI

Shodno dobroj praksi koja je prepoznata i od Međunarodnog olimpijskog komiteta, OK BiH će nastaviti pozitivnu praksu projektnog djelovanja u svim oblastima od interesa za sportski sistem Bosne i Hercegovine. Projektne aktivnosti finansiranja putem fonda Olimpijske solidarnosti MOK-a te Evropske unije čine dva osnovna stuba projektnog djelovanja OK BiH. Projektni menadžment će se razvijati u skladu sa realnim mogućnostima i dostupnim grantovima u oblasti sporta.

Nastaviti pozitivnu praksu i dinamiku apliciranja i realizacije projekata Olimpijske solidarnosti koji su usmjereni na sportiste, trenere, unapređenje menadžmenta i olimpijske vrijednosti, te osnažiti i educirati kadrove sportskih saveza za potrebe učešća u realizaciji projekata Olimpijske solidarnosti.

Cilj je povećati učešće OK BiH u programima Evropske unije za dodjelu bespovratnih sredstava, omogućiti uslove za edukaciju kadrova iz sportskih saveza i klubova za potrebe apliciranja i realizacije projekata koje se finansiraju sredstvima Evropske unije, te kreirati bazu i kvalitetan networking sportskih organizacija koje apliciraju i realizuju projekte EU.

10.ODRŽIVI RAZVOJ

Olimpijski komitet Bosne i Hercegovine je prepoznao nužnost djelovanja u oblasti održivog razvoja u kojoj će nastaviti pratiti upute MOK-a , EOK-a u skladu sa mogućnostima i dostupnim resursima.

11.ODRŽIVI SPORT I KLIMATSKE AKCIJE

Ekološki standardi za sportske događaje, smanjenje ugljičnog otiska OK BiH, podizanje svijesti o uticaju klimatskih promjena na sport, edukacije.

12.KOMUNIKACIJE I DIGITALNE PLATFORME

Savremeno oglašavanje i promocija aktivnosti podrazumijeva prisutnost na društvenim mrežama i online platformama. OK BiH aktivno koristi digitalne kanale za promociju sportskih događaja, sportista i olimpijskih vrijednosti, čime promoviše sopstvene aktivnosti te se povezuje sa interesnim stranama, uključujući i potencijalne sponzore. Strateški cilj je unaprijediti komunikaciju na svim platformama kako bi se u potpunosti iskoristio potencijal rada i djelovanja Olimpijskog pokreta u Bosni i Hercegovini. Da bi se ostvario navedeni cilj potrebno je profesionalizovati komunikacije putem digitalnih platformi.

13.INFRASTRUKTURNI PROJEKTI

Održavati postojeću infrastrukturu u vlasništvu OK BiH uz poštovanje svih zakonskih regulativa BiH i međunarodnih standarda. Rješavanje pravnog statusa vlasništva prostorija Olimpijskog komiteta Bosne i Hercegovine u sklopu Olimpijskog centra Zetra. Aktivno podržavati i promovisati ideju obnove olimpijskih borilišta od strane nadležnih nivoa vlasti i ministarstava do njene konačne realizacije.

14.RODNA RAVNOPRAVNOST I INKLUZIJA

Osigurati ravnopravne uslove za muške i ženske sportiste, uključivanje žena u pozicije odlučivanja u sportu, razviti i poticati programe "sport za sve", borba protiv diskriminacije.

